

Baca bahan di bawah dengan telitinya dan jawab soalan-soalan yang berikutnya.

Soalan 1 – 5 berdasarkan bahan di bawah.

Walaupun pada masa ini anakanda berada jauh di rantau, namun anakanda dapat merasakan suasana sedih yang menyelubungi keluarga kita semenjak pemergian ayahanda yang dikasihi.

Bondaku, hidup ini tidak selalunya indah. Sebagaimana yang bonda maklum, dengan menjelangnya bulan Jun ini telah tiga bulan ayahanda meninggalkan kita. Selain rasa sedih yang mendalam yang menyelubungi keluarga kita, pemergian ayahanda telah menggugat persekolahan anakanda juga.

Dua bulan belakangan ini, bayaran asrama anakanda tidak beres sepenuhnya. Anakanda masih berhutang dengan pihak sekolah sebanyak empat puluh ringgit. Oleh itu, anakanda telah membuat keputusan untuk pulang ke kampung buat sementara waktu. Sekiranya anakanda terus berada di asrama ini, tentulah masalah kita akan bertambah.

Apabila anakanda pulang nanti, anakanda akan menatap potret ayahanda yang tentunya masih tergantung pada dinding ruang tamu rumah kita itu. Anakanda selalu teringat akan arwah ayahanda.

Sekianlah dahulu untuk kali ini. Sembah salam daripada anakanda untuk bonda, nenda dan adinda yang dikasihi.

Yang benar,

Hayati

Dipetik daripada drama 'Hadiah', Antologi *Kuingin Berterima Kasih*,
Tingkatan 1, Kementerian Pendidikan Malaysia

1. Apakah perkara yang dijelaskan oleh Hayati dalam surat tersebut?
- A Yuran asrama Hayati tidak dijelaskan sepenuhnya.
 - B Hayati berhasrat untuk pulang ke kampung untuk menziarahi ibunya.
 - C Hayati sentiasa bersedih ekoran kehilangan bapanya yang dikasihi.
 - D Hayati sering menatap potret ayahnya.

2. Sekiranya anakanda terus berada di asrama ini, tentulah masalah kita akan bertambah.

Nyatakan peribahasa yang sesuai dengan pernyataan di atas.

- A Cermat masa banyak, jimat masa sedikit
- B Sudah jatuh ditimpa tangga
- C Ibarat melukut di tepi gantang
- D Belum duduk sudah berlunjur

3. Apakah gaya bahasa yang digunakan dalam petikan drama di atas?

- A Peribahasa
- B Kata ganda
- C Bahasa halus
- D Bahasa asing

4. Latar masa yang berikut terdapat dalam petikan cerpen di atas **kecuali**

- A bulan Jun.
- B dua bulan.
- C tiga bulan.
- D bulan Oktober.

5. Pilih pernyataan yang **tidak benar** tentang perwatakan Hayati berdasarkan petikan.

- A Berhemah tinggi
- B Penyayang
- C Rasional
- D Pemaaf